

En sociedade



Laura Alonso.

LAURA ALONSO PROTAGONIZARÁ UNHA NOITE DE ÓPERA EN VILALBA

O vindeiro oito de xuño, os vilalbeses terán a oportunidade de asistir a unha gala lírica no auditorio Carmen Estévez, parte de cuxa recadación será para a Fundación Amigos de Galicia. As artistas —entre as que se atopan **Francisca Beaumont** e a soprano de raíces lucenses **Laura Alonso**— interpretarán ‘A damoiselle Élue’, de **Debussy**, e ‘Suor Angelica’ de **Puccini**. Unha oportunidade única cun prezo apto para tódolos petos: dez euros.

MANUEL AYASO E AFONSO COSTA EXPOÑEN EN A CATEDRAL ‘ENTREDÓS’

A exposición ‘Entredós’, de **Manuel Ayaso** (Aguíño, 1934) e **Afonso Costa** (Noia, 1943), permanecerá aberta na galería lucense A Catedral ata o vindeiro día 15 de xuño. A mostra ten colgados nove acrílicos sobre lenzo de Costa e unha serie de técnicas mixtas de Ayaso. A exposición complétase con obras feitas a medias.

UN LUCENSE, O REPRESENTANTE ESPAÑOL NUN FORO DE DEREITO CONCURSAL

O letrado lucense **Juan Carlos Rodríguez Maseda** concluíu xa a súa estadía en México, país ao que viaxou como representante español no VIII Congreso Iberoamericano de Dereito Concursal, que se celebrou do 17 ao 19 de maio. O relatorio de Rodríguez Maseda levaba por título ‘O camiño europeo para a harmonización do Dereito da insolvencia’.

A LCVS MODA LOGROU UNHAS BOAS VENDAS PARA OS DESEÑADORES

Os creadores —seis deseñadores, quince artesáns e dez perruqueiros— que participaron na gala Lcvs Moda están encantados, xa que non deixaron de recibir parabéns polo seu traballo desde entón. Pero é que, ademais, a pasarela tamén deixou notar a súa influencia nas vendas de moitos deles. Este é o caso de **Luis Areñas**, ao que o pasado sábado só lle quedaban sen vender dous dos traxes exhibidos na pasarela. Tamén **Montse Arias** e **Sara Lage** e **Maru Calderón** recibiron uns cantos encargos por mor da súa participación na Lcvs.

BESTEIRO. O presidente da Deputación, **José Ramón Gómez Besteiro**, está moi satisfeito por isto, xa que el foi quen máis se esforzou en que esta edición chegase a bo porto. Ademais, a deseñadora **Kina Fernández** confesoulle a súa admiración polo nivel organizativo e dos traballos exhibidos.

POR MARU TORRES
✉ extras@elprogreso.es



Claudio Rodríguez Fer.

A UNIVERSIDADE DA ALTA BRETAÑA DISTINGUE A RODRÍGUEZ FER

O escritor lucense e director da cátedra Valente de Poesía e Estética da Universidade de Santiago de Compostela **Claudio Rodríguez Fer** foi nomeado doutor Honoris Causa pola Universidade de Alta Bretaña en Rennes. Entre os escritores hispánicos recoñecidos están tamén o peruano **Mario Vargas Llosa**, o chileno **Jorge Edwards** ou o franco-español **Jorge Semprún**, sendo Rodríguez Fer o primeiro galego ao que se lle fai tal distinción.

O abano

¿Que lle pasa a Telma Ortiz?

ROSA VILLACASTÍN



QUE lle pasa a Telma Ortiz, ¿a que ten medo?, ¿por que se comporta dunha forma tan absurda cos medios de comunicación? Tres preguntas para as que confeso que non teño unha resposta, porque seguro que os meus razoamentos nada teñen que ver cos que manexa a irmá da princesa de Asturias. Unha muller que cativou pola súa elegancia na voda dos Príncipes e á que admiramos pola súa dedicación humanitaria en países como Filipinas, pero que perdeu o norte a súa volta a España. Posiblemente pola mala influencia de quen no canto de aconsellarlle que se tome as cousas con calma, a animou a demandar a 50 medios de comunicación dunha atacada. Pola contra, súa nai, Paloma Rocasolano, ante preguntas indiscretas contesta co mellor dos seus sorrisos, sabendo que ser nai e avoa das futuras raíñas de España ten as súas servidumes, o que lle valeu o respecto da prensa. Un respecto que se lle perdeu a Telma, despois do numeríño protagonizado por ela e o seu xa marido Jaime do Burgo con motivo da súa voda, e despois de que eu mesma anunciase que casaban o 7 de xullo en Artajona, en Navarra. Unha noticia totalmente contrastada, que polo que parece os obrigou a cambiar a data e o lugar do enlace, o que non impediu que se lles fixesen fotos ás portas do mosteiro de Leyre e que estas se venderan, o que os terá enfurecido. Pero sendo este comportamento preocupante, máis o son as informacións que están a saír á luz por este motivo, e que poden causar gran dano a unha institución, a monarquía, que non pasa polos seus mellores momentos. De maneira que a Telma e a Jaime hai que pedirles que se tranquilicen e que cando vexan unha cámara contengan ata dez, xa que está en xogo o prestixio da súa irmá e cuñada.



José Ramón Gómez Besteiro e Kina Fernández —segunda pola dereita—, compartindo confidencias. J. VÁZQUEZ